



# PATNUBAY SA MISA

8 Setyembre 2024

Ika-23 Linggo sa Karaniwang Panahon

Taon B

## Ibukas ang Bibig at Ibigkas ang Luwalhati ng Diyos!

**J**sang malaking kapansanan ang pagiging bingi o pipi. Ngunit masahol pa sa pisikal na pagkabingi at pagkapipi ay ang mga anyong espirituwal ng ganitong mga “kapansanan” – ang kawalan ng kakayahan o kagustuhang makinig sa Salita ng Diyos at tumugon dito, o ang pagtanggap makinig sa mga daing ng ating kapwa at tumugon dito nang may habag at pagmamahal.

Naibalik ni Hesus sa isang bingi at pipi ang mga biyayang makarinig at makapagsalita. Kaya rin niyang gumawa ng lalong malaking himala ng pagpapagaling sa mga espirituwal na bingi at pipi sa atin. Sa Eukaristiyang ito, magpakumbaba at buong pananalig tayong manalangin na makadulog kay Hesus, at maging handang sumunod sa kanya upang malinaw nating mapakinggan ang Salita ng Diyos sa ating mga puso. Ito ang maka-aakit sa atin na tumugon nang bukas-palad sa pagtawag ng ating kapwa at ipahayag ang Kanyang kaluwalhatian sa salita at sa gawa. Maging handa nawa tayo laging ibukas ang bibig at ibigkas ang luwalhati ng Diyos sa buhay natin.



### PASIMULA



#### Pambungad

(Ipahahayag lamang kung walang awiting nakahanda.)

**Ikaw ay tama at banal sa tapat mong kautusan, Panginoong aming mahal. Kami'y iyong pag-ukulan ng lugod mo't kasiyahan.**

#### Pagbati

**P**– Sa ngalan ng Ama at ng Anak at ng Espiritu Santo!

**B**– Amen!

**P**– Ang pagpapala ng ating Panginoong Hesukristo, ang pag-ibig ng Diyos Ama, at ang pakikipagkaisa ng Espiritu Santo ay sumainyong lahat!

**B**– At sumaiyo rin!

#### Pagsisisi

**P**– Mga kapatid, tinipon tayo bilang mga kaanib ng angkan

ng Diyos, kung kaya't dumulog tayo sa maawaing Panginoong nagpapatawad na lubos. (*Manahimik saglit.*)

**P**– Panginoon, iminulat mo ang bulag. Panginoon, kaawaan mo kami!

**B**– Panginoon, kaawaan mo kami!

**P**– Panginoon, binuksan mo ang tainga ng bingi. Kristo, kaawaan mo kami!

**B**– Kristo, kaawaan mo kami!

**P**– Panginoon, ikaw ang bukal ng aming pag-asa at kaligtasan. Panginoon, kaawaan mo kami!

**B**– Panginoon, kaawaan mo kami!

**P**– Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

**B**– Amen!

### Papuri

**B**– Papuri sa Diyos sa kaitaan sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan,

kasama ng Espiritu Santo sa kadakilaan ng Diyos Ama. Amen!

### Panalangin Pambungad

**P** –Ama naming makapangyarihan, kaming mga tinubos mo at kinupkop ay tunguhan mo ngayon sa iyong kagandahang-loob upang sa pagsampalataya sa Anak mong si Kristo, makamtan ang kalayaan at pamana sa piling mo sa pamamagitan niya kasama ng Espiritu Santo magpasawalang hanggan.  
**B** –Amen!

### PAGPAPAHAYAG NG SALITA NG DIYOS



**Unang Pagbasa** *Isa 35:4-7*  
*Dulot ni Isaias sa mga ipinatapon sa Babilonia ang isang makahulugang paglalarawan ng Panginoon alang-alang sa Kanyang bayan. Napawi ang lahat ng tanda ng pagdurusa at pang-aapi, salamat sa mapagligtas na pagmamahal ng Diyos.*

**L**– Pagbasa mula sa Aklat ni Propeta Isaias

**Ito ang sabihin sa pinanghinaan ng loob:** “Huwag kang matakot, lakasan mo ang iyong loob, darating na ang Panginoong Diyos, at ililigtas ka sa mga kaaway.

Ang mga bulag ay makakikita, at makaririnig ang mga bingi; katulad ng usa, ang pilay lulundag, aawit sa galak ang mga pipi. Mula sa gubat ay bubukal ang tubig at ang mga batis dadaloy sa ilang; ang umuusok na buhanginan ay magiging isang lawa, sa tigang na lupa ay babalong ang tubig.”


Ang Salita ng Diyos!

**B** –Salamat sa Diyos!

**Salmong Tugunan** *Awit 145*

**B**–*Kalul’wa ko, ‘yong purihin ang Panginoong butihin!*

*R. M. Velez*



\* **Ang maasahang lagi’y Panginoon, panig sa naaapi, ang Diyos na hukom; may pagkaing handa, sa nangagugutom.** **B.**

\* **Pinalaya niya ang mga nabihag; isinasauli, paningin ng bulag. Lahat ng inapi ay itinataas, ang mga hini-rang niya’y nililingap.** **B.**

\* **Isinasanggalang ang mga dayuhang sa lupain nila’y doon tumatahan; tumutulong siya sa balo’t ulila, masamang balangkas pinipigil niya.** **B.**

\* **Walang hanggang Hari, ang Diyos na Poon! Nabubuhay lagi ang Diyos mo, Sion!** **B.**

**Ikalawang Pagbasa** *San 2:1-5*

*Ano mang uri ng paghamak sa mahihirap ay labag sa Kristiyanong pagmamahal, pagkat sila man ay mga anak ng Diyos at mga kabahagi ng Katawan ni Kristo. Dapat nating tularan ang halimbawa ng Diyos na may tanging pagtingin at pagmamahal sa mahihirap.*

**L**– Pagbasa mula sa Sulat ni Apostol Santiago

**Mga kapatid, bilang sumasampalataya sa ating Panginoong Hesukristo, ang dakilang Panginoon, huwag kayong magtatangi ng tao. Halimbawa: pumasok sa inyong kapulungan ang isang lalaking nakasingsing ng ginto at nakadamit nang magara, at isa namang dukha na panay sulsi ang damit. Kung asikasuhin ninyong mabuti yaong magara ang damit at sabihin sa kanya, “Dito kayo maupo,” at sabihin naman sa dukha, “Tumayo ka na lang diyan,” o kaya’y “Sa sahig ka na lang maupo,” nagtatangi na kayo at humahatol nang mali.**

**Tingnan ninyo, mga kapatid kong minamahal! Hinirang ng Diyos ang mga dukha sa sanlibutan upang maging mayaman sa pananampalataya at maging kasama sa kahariang ipinangako niya sa mga umiibig sa kanya.**

Ang Salita ng Diyos!

**B** –Salamat sa Diyos!

**Aleluya**

**B** –Aleluya! Aleluya!

**Ipinangaral ni Hesus ang paghahari ng Diyos. Sakit ay kanyang ginamot. Aleluya! Aleluya!**

**Mabuting Balita** *Mc 7:31-37*

*Ipinahayag ni Propeta Isaias na tatampukan ng mga dakilang himala ang pagdating ng Mesiyas. Ang inilalarawan sa sipi ngayon ng Ebanghelyo ay bahagi ng katuparan ng propesiya ni Isaias.*

**P** –Sumainyo ang Panginoon!

**B** –At sumaiyo rin!

**P**– Ang Mabuting Balita ng Panginoon ayon kay San Marcos

**B** –Papuri sa iyo, Panginoon!

**Noong panahong iyon, pagbabalik ni Hesus mula sa lupain ng Tiro, dumaan siya sa Sidon, at nagtuloy sa Lawa ng Galilea, matapos tahakin ang lupain ng Decapolis.**

**Dinala sa kanya ang isang lalaking bingi at utal at ipinamahirap nila na ipatong sa taong ito ang kanyang kamay. Inilayo muna siya ni Hesus sa karamihan, at isinuot ang kanyang mga daliri sa mga tainga nito. Pagkatapos, lumura at hinipo ang dila nito. Tumingala si Hesus sa langit at nagbuntonghininga, at sinabi sa tao, “Effata,” ibig sabihi’y “Mabuksan!” At nakarinig na ito, nawala ang pagkautal at nakapagsalita na nang malinaw. Sinabi ni Hesus sa mga tao na huwag ibalita ito kaninuman; ngunit kung kailan sila pinagbabawalan ay lalo naman nilang ipinamamalita ito.**

**Sila’y lubhang nanggilalas, at ang wika, “Anong buti ng lahat ng kanyang ginawa! Nakaririnig na ang bingi, at nakapagsasalita ang pipi!”**

Ang Mabuting Balita ng Panginoon!

**B** –Pinupuri ka namin, Panginoong Hesukristo!

### Homiliya

#### Sumasampalataya

**B**–Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay

na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng na-ngamatay na tao at sa buhay na walang hanggan. Amen!

### Panalangin ng Bayan

**P** –Sa kabila ng mga biyayang dulot ng makabagong agham at teknolohiya, nakararanas pa rin tayo ng kakulangan at limitasyon sa lahat ng aspeto ng ating buhay. Kailangan pa rin natin ang mapagligtas na pamamagitan ng Diyos sa ating buhay.

**B** –Panginoon, dinggin Mo kami!

\* Para sa Simbahang Katolika: Nawa’y magtagumpay siya sa pagtataguyod ng pangmatalagalang kapayapaan at tapat na pakikipagkasundo sa mga bansa. Manalangin tayo! **B.**

\* Para sa mga pinanghihinaan ng loob at waring napapabayaang ng lahat: Nawa’y makatagpo sila ng malinaw na tanda ng pagkalinga ng Diyos. Manalangin tayo! **B.**

\* Para sa mga may kapansanang pisikal: Nawa’y makadama sila ng pagtanggap at pagmamahal sa kanilang mga kamag-anak at pasanin nila ang kanilang krus nang may buong pananalig. Manalangin tayo! **B.**

\* Para sa mga kabinghihang espiritual at moral: Nawa’y buksan ng biyaya ng Diyos ang kanilang mga kalooban sa pagtanggap ng mensahe ng Mabuting Balita at tumugon sila sa mga daing ng kanilang kapwa. Manalangin tayo! **B.**

\* Para sa mga kautalang espiritual at moral: Nawa’y makatagpo sila kay Hesus ng lakas ng loob na magpahayag ng katotohanan, manindigan sa tama, at isumpa ang masama. Manalangin tayo! **B.**

\* Upang tayong lahat ay matutong makinig sa panaghoy ng

kalikasan at sa pagtanggap ng lahat ng biktima ng mga trahedyang sa kalikasan at hagupit ng pagbabago ng klima, at nang lahat ay matuto ring mangalaga para sa daigdig na kinalalagyan natin. Manalangin tayo! **B.**

**P** –Panginoon Diyos, panghihinaan kami ng loob kung wala Ka, ngunit kung kasama Ka namin, may magagawa kaming mga kadakilaan. Pagalingin Mo kami ngayon sa aming mga pangamba, kahinaan, at kapintasan nang kami’y mabuhay sa Iyong presensiya nang may pinasiglang kalooban. Sa pamamagitan ni Kristong aming Panginoon.

**B** –Amen!



**P** –Manalangin kayo . . .

**B** –Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

### Panalangin ukol sa mga Alay

**P** –Ama naming Lumikha, ikaw ang gumagawa ng wagas na katapatan at kapayapaan. Ipagkaloob mong ang iyong kadakilaan ay aming handugan ng iyong minamarapat na aming maialay at nawa’y magkaisa kami sa pakikinabang sa banal na paghahaing ngayo’y ipinagdiriwang sa pamamagitan ni Hesukristo kasama ng Espiritu Santo magpasawalang hanggan. **B** – Amen!

### Prepasyo III

**P** –Sumainyo ang Panginoon!

**B** –At sumaiyo rin!

**P** –Itaas sa Diyos ang inyong puso at diwa!

**B** –Itinaas na namin sa Panginoon!

**P** –Pasalamatan natin ang Panginoon at Diyos!

**B** –Marapat na siya ay pasalamatan!

**P** –Ama naming makapangyarihan, tunay ngang marapat na ikaw ay aming pasalamatan.

Sa iyong kagandahang-loob kami’y iyong ibinukod upang iyong maitampok sa kadakilaan

mong lubos. Kahit na ikaw ay aming tinalikdan dahil sa aming pagkasalawahan, gumawa ka pa rin ng magandang paraang may manguna sa amin para ikaw ay balikan. Kaya’t ang iyong minamahal na Anak ay naging isa sa mga taong hamak upang may kapwa kaming makapagligtas sa aming pagkapahamak at pagkalingaw ng landas.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

**B** –Santo, santo, santo Panginoon Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

### Pagbubunyi

**B** –Aming ipinahahayag na namatay ang ‘yong Anak, nabuhay bilang Mesiyas at magbabalik sa wakas para mahayag sa lahat.



**B** – Ama namin . . .

**P** – Hinihiling namin . . .

**B** –Sapagkat iyo ang kaharian at ang kapangyarihan at ang kapurihan magpakailanman! Amen!

### Paanyaya sa Kapayapaan

#### Paghahati-hati sa Tinapay

**B** –Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

### Paanyaya sa Pakikinabang

**P** –Ito ang Panginoon Hesus. Nang dahil sa kanya, nakaririnig ang mga bingi at nakapagsasalita ang mga pipi. Siya ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

**B** – Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

**Antipona ng Pakikinabang**  
(Ipahahayag lamang kung walang awiting nakahanda.)

**Kami'y usang nauhaw sa tubig na nasa bukal, ika'y pinananabikan, Diyos naming minamahal, tubig kang buhay ang alay.**

**Panalangin Pagkapakinabang**

**P** –Ama naming mapagmahal, kaming pinapagsalo mo sa iyong salita at piging na banal ay iyong pinalalakas at iyong binubuhay. Pagindapatin mong kami'y makapakinabang sa buhay ng iyong Anak na para sa ami'y sarili niya ang alay bilang aming Tagapamagitan kasama ng Espiritu Santo magpasawalang hanggan.

**B –Amen!**



**P** –Sumainyo ang Panginoon!

**B** –At sumaiyo rin!

**P** –Magsiyuko kayo at ipanalangin ang pagpapala ng Diyos. (Manahimik saglit.)

–Pagpalain nawa kayo ng Diyos sa lahat ng bagay at pagkalooban kayo ng kapayapaan sa inyong buong buhay.

**B –Amen!**

**P** –Iligtas nawa Niya kayo sa lahat ng alalahanin at pasiglahin nawa ang inyong mga puso sa Kanyang pagmamahal.

**B –Amen!**

**P** –Pagyamanin nawa Niya kayo ng Kanyang mga kaloob na pananampalataya, pag-asa, at pagmamahal upang ang anumang gawin ninyo rito sa buhay na ito ay magdulot sa inyo ng kaligayahan ng buhay na walang hanggan.

**B –Amen!**

**P** –Pagpalain kayo ng makapangyarihang Diyos: Ama, Anak, at Espiritu Santo.

**B –Amen!**

**P** –Humayo kayo sa kapayapaan upang mahalín at paglingkuran ang Panginoon sa inyong kapwa.

**B –Salamat sa Diyos!**

## **BUKA, BUKAS, BIGKAS!**

*Kalakbay at Katoto*

**T**atlong magkakaugnay na kataga ang lumulutang sa tatlong pagbasa natin sa Misa: **buka, bukas, bigkas!**

Sa unang pagbasa, isang hula ang humulas sa bibig ni Isaias: *“ang bibig ng mga pipi ay aawit.”* Sa ikalawang pagbasa, ang diwa ng kabukasan, ang pantay na pagtrato sa kapwa ang siya namang binigyang-diin ni Santiago: *“Huwag magpakita ng pagtatangi kaninuman.”* Sa ebanghelyo, isa namang maigting na bigkas ang sinasaad ng ikatlong pagbasa: *“Ginawa niya nang mabuti ang lahat. Nabuksan Niya ang tenga ng mga bingi, at nakapagwika ang mga pipi.”*

**Marami ngayon ang panay ang buka ang bibig sa walang patid na paghahanda sa eleksyon.**

Marami ang panay ang ngawa sa pagtatatwa ng lahat ng uri ng kamalian sa lipunan.

**Nguni't batay sa ating mga pagbasa, hindi sapat ang magbuka ng bibig.**

Lalong hindi sapat ang magpahulas ng madudulas na pangako! Ang hula ni Isaias sa unang pagbasa ay hindi lamang isang halimbawa ng kabukasan ng bibig at isipan, bagkus isang kabukasan sa katotohanan tungkol sa Diyos na maawain. Payo ni Isaias sa atin: *“Huwag matakot; magpakatatag!”*

**Sa ating lipunan, madaling manalo, hindi ang tunay na marunong, kundi ang mga matatalino lamang.**

Madaling mahalal ang mga popular at mababait, nguni't hindi ang bukas ang puso at isipan sa tunay na kabutihan! Nakalulusot malimit ang mga may kiling,

ang may paboritong mga taga-sunod, ang mga makatutulong rin sa kanila pagdating ng eleksyon. Tahasang taliwas ito sa tagubilin ni Pablo: *“Huwag magpakita ng pagtatangi kaninuman.”*

Maganda ang makinig sa mga pagbasa. Matamis kung minsan ang mga pananalitang naririnig natin. Subali't ang banal na kasulatan ay dapat maging buhay natin lahat. Dapat na ito ay maghatid sa buhay na ganap – para sa mayaman at para sa mahihirap.

**Sa dami ng kahirapan sa daigdig, maraming tao ang nag-sasabing wala nang panahon na puedeng gugulin sa mga walang kapararakang bagay.**

Marami ang wala ni isang oras tuwing Linggo sa pagsamba, sa pagbibigay ng nararapat sa Diyos. Ang pagdarasal, para sa marami, ay tila isang pagsasayang ng panahon, na walang ibubungang mabuti.

**Nguni't bahagi ng pangaral ngayon ng mga pagbasa ang wastong pagbubuka ng bibig bilang papuri sa Diyos.**

Hinihingi ng katarungan na ipagkaloob sa Diyos ang nararapat sa Kanya. At ayon kay Isaias, pati mga pipi ay aawit ng papuri sa Diyos.

Malinaw rin na pangaral ng mga pagbasa ang batayan ng kakayahang magpuri sa Diyos. Ito ang pagiging bukas sa katotohanang ang Diyos ay may kinalaman sa buhay ng tao. **Ang Diyos ay hindi isang tuod na estatwa lamang na walang pakialam sa atin. Siya**



**WORD AND LIFE  
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: [www.wordandlife.org](http://www.wordandlife.org)

• E-mail: [wordandlifepublications@gmail.com](mailto:wordandlifepublications@gmail.com) • FB: Word And Life Publications

• Editorial Team: Fr. B. Nolasco, Fr. J. Camaya, Fr. C. Dimaranan, V. David, R. Molmog, D. Daguio

• Illustrations: A. Sarmiento, B. Cleofe • Circulation: R. Saldua

ay Ama at Panginoon na may malasakit sa buhay natin. Siya rin ay walang pagtatangi sa kaninuman at ang tingin Niya sa atin ay pantay-pantay.

At dito ngayon papasok ang pinakamahalaga sa lahat – ang bunga ng pagiging buka ang bibig sa pagpaparangal at pagpupuri sa Diyos; ang bunga rin ng pagiging bukas ang puso at kaisipan sa kanyang pagka-Diyos.

Ito ang bigkas ng pusong nagmamahal, ang bigkas ng bibig

ng isang taong may malasakit sa Diyos at sa Kanyang kaluwalhatian. Ito ang bigkas ng pag-ibig, ang bigkas ng panalangin, ang bigkas ng bibig at damdamin na kumikilala sa Diyos bilang Diyos, Ama, at Panginoon. Malayong malayo ito sa bigkas ng mga tampalasang walang bukam-bibig kundi ang kapakanan daw ng iba, nguni't walang ibang hinahanap liban sa paglawig ng kanilang kapang-yarihan, at paglago ng yaman.

Ito ang ginagawa natin ngayon sa Banal na Misa. Mula sa

simula, ang Misa ay isang pamumukadkad ng pag-ibig ng Diyos sa kanyang bayan. Mula sa simula hanggang sa wakas, ang lahat ay may kinalaman sa kabukasan ng Kanyang walang maliw na pag-ibig sa atin. Mula sa simula hanggang sa katapusan, ang Misang ito ay isang mahaba, matimyas, at madamdaming pagbigkas ng Kanyang kaluwalhatian. *“Ang lahat ay ginawa Niya nang mabuti . . . Nakaririnig ang mga bingi at nakapagwiwika ang mga pipi.”* Purihin ang Kanyang ngalan!

**Come and visit  
our booth and enjoy  
our special discounts and freebies!!!**



**Booth #254**  
MANILA INTERNATIONAL BOOK FAIR

GET IT

MANILA INTERNATIONAL BOOK FAIR

SEPTEMBER 11-15, 2024  
SMX CONVENTION CENTER MANILA, PHILIPPINES

Manila Book Fair @manilabookfair @ManilaBookFair

